

1 TESALONICENSES

Marí ke Pablo, rijwáke'ena wa'até, wakára'aka puráka'aloji Jesucristo ja'apiyá jema'ajéñojlo

1 ¹Nuká, kéchami Silvano, eyá Timoteo, kele weká ajalákaño iká Jesucristo ja'apiyá jema'ajeño, pajimila Tesalónica e i'imakaño. Pajluwa japi keja iká pajwa'atéchaka, wara'apá wani Tupana, eyá Jesucristo wa'até. Nuwata nala'aká iká palá, ipechu kawíla'ako piyá nakaje nakú.

Palá nema'aká Tupana ja'apiyá yukuna marí

²Wapura'akó Tupana wa'até kewá, wemaká inaku rijló: “Palá pila'aká weká, nema'akale pa'apiyá”, ke. ³Wawe'epí ipechu i'imaká kaphí richojé, rila'akáloje ijló nakaje riwátakare. Wawe'epí kaja kaphí ijápaka, íki'ija iwátakale Tupana. Wawe'epí unká iyurila Jesucristo chojé i'imakana kaphí, chapú yajwé amaka e'iyonaja, i'imakale ripa'ajiko majó wakajé wátakana nakú. ⁴Nojena, Tupana wajwena wani iká. Wawe'epí ri'iwapaká rijluwa i'imaká ajopana e'iyayá, i'imakáloje rila'ejena ina'ukena penaje. ⁵Ri'imataka iná kapichákajo liyá yukuna we'emaká ijló wakajé, unká riyukúnaja kalé we'emá ijló i'imaká. Riyukuna jema'akana aú, kajrú Tupana Pechu a'aká ináthé, a'akáloje wani inakojó riká. Iwe'epí mékeka wala'ajika nakaje ilérowa, ri'imakáloje palá ijlojé penaje.

⁶Wala'aká i'imaká, ke kaja ila'aká chuwa wajewemi, raú ila'á Jesucristo la'ajika ke kaja.

Tupana puráka'alo ja'apiyá jema'akana jimaje, ajopana ina'ukena la'akeño iká chapú i'imajika. E'iyonaja kalé pu'ují ipechu i'imajika Ripuráka'alo ja'apiyá jema'akana aú. Ripéchuja kalé la'arí ipechu pu'ují. ⁷Palá la'akaná nakuja iká ilérowa me'etení. Palá ajopana Jesucristo ja'apiyá jema'ajeño, Macedonia te'eré ewájena, eyá Acaya te'eré ewájena, kele amaka ila'aká palá, rejomi nala'akáloje ñaké kaja amájemi penaje. ⁸Ilé ke ajopana Macedonia te'eré eyájena amaka aú, nema'á kaja Tupana puráka'alo ja'apiyá.

Unká nekaja kalé jema'año riyukuna, piyukeja rewá i'imakaño wa'ató jema'año kaja riyukuna. Kaphí ipechu Tupana chojé, raú kalé ila'á palá. Ñaké i'imakale, unká na penaje kalé we'emá najló riyukuna rewá, kaja nema'akale riká. ⁹Neká kemaño wajló inaku mékeka palá wani ijló ri'imaká, we'emaká ichaje wakajé. Nemá kaja inaku: “Kaja nayurí naliyó nakaje jenami, napechu i'imajíkare nakú: ‘Wachi'inárikana riká’, ke, ja'apí iphákana, lanakiya nala'akáloje iná Chi'inárikana wani Tupana wátaka ke penaje”. Unká mapéjari yuku kalé riká; kajmuni riká; ra'apí iphájajeño chuwa iká. ¹⁰Nemá kaja inaku: “Jesucristo, Tupana i'irí, pa'ajero piño majó je'echú chiyá, wátakana nakú neká. Riká ne'emakare wátakana nakú, taka'arí i'imaká, rejomi Tupana makápo'ota piño ri'imaká. Ri'irí palamane aú unká riwajálaje weká, íki'ija wani pu'uaré wala'akare chona. Ñakele ne'emátájeri Jesucristo wátakana nakú neká, riphájika majó ejená”, ke nemaká inaku.

Nakaje Pablo la'akare Tesalónica e yukuna marí

2 ¹Nojena, kaja iwe'epí we'emaké ijwa'até wakajé, unká mapeja kalé we'emajika ijwa'até i'imajika. ²Iwe'epí kaja mékeka nala'aká we'emaká chapú wani pajimila Filipos e, we'ejnáká ichaje Tesalónica ejo i'imaká yámona. Pu'uaré wani kaja napura'akó wanaku re we'emaké wakajé. Reyá we'ejná ichaje. Kajrú wani Tupana a'aká wañathé, we'emakáloje ijló ri'imataka iná kapichákajo liyá yukuna. Riyukuna we'emá ijló, Tupana la'akale kaphí wapechu. Ne'iyajena unká wani wátalaño we'emaká riyukuna ijló i'imaká, e'iyonaja kalé we'emá riyukuna ijló. ³Kewaka nakaje wemakare nakú ina'ukejlo, unká pajlakaje kalé wapuráka'alo. Unká wajló ri'imakáloje palá penaje kalé we'emá riyukuna; unká kaja we'emalá riyukuna ijló, wapajlákaloje ijwa'até raú. ⁴Tupana kemari wanaku: “Palani neká, nuyukuna i'imajeño penaje”, raú riwakára'a we'emaká riyukuna ajopánajlo. Riwátaka ke, we'emaká riyukuna ñakeja, unká wemalá nakaje nakú mapeja, ina'uké pechu i'imakáloje palá wanaku raú. Wala'á nakaje, ri'imakáloje palá Tupana nakú. Iná pechu pala'atájeri wani riká. ⁵⁻⁷Kaja iwe'epí palá, unká wemalá inaku mapeja: “Palá i'imakaño neká”, ke, ipechu i'imakáloje pu'ují wanaku raú. Unká wawátala ipura'akó wanaku palá mapeja; ñaké kaja unká wawátala ajopana ina'ukena pura'akó wanaku palá mapeja. Unká ilé kaje penaje kalé we'emá riyukuna ijló i'imaká; unká kaja a'akáloje wajló liñeru penaje kalé we'emá ijló riyukuna. Jesucristo wakára'akarena

nakiyana weká, ñakele wawátakela, wawakára'ajla ila'aká nakaje wajló we'emaké ijwa'até wakajé, e'iyonaja unká wawakára'ala ila'aká na wajló. Tupana we'epiri kewaka ilé numakare nakú.

Unká yuriná kalé we'emaká ijwa'até. Yuwaná jaló lamára'aka ruyani, keja we'emaká ijwa'até. ⁸Wawajwena kaja iká; khaí wani wawe'epika inaku. We'emá ijló Tupana puráka'alo yukuna, íki'ija wawátakarena i'imakale. Raú kalé wawe'epí palá nakaje la'akana watukumó, ri'imakáloje palá ijló penaje. Wawátajla kaja ichaya taka'akana, ñaké la'akana i'imakela palani ijló.

⁹Nojena, iwe'epí wajápajika kaphí wani we'emaké ijwa'até wakajé, wawarúwa'akaloje wajluwa a'ajnejí, a'arumakaji, kaje maká penaje. We'echú, eyá laínchu lapejé wa'ató, wajápake, wakawíla'aka piyá inaku; unká wawátala iliyá nakaje kejá'akana i'imaká. Tupana puráka'alo yukuna we'emakáloje ijló penájeja kalé we'emaké ijwa'até.

¹⁰Kaja iwe'epí kewaka piyukeja numakare nakú; Tupana we'epiri kaja kewaka riká. Iká, Jesucristo ja'apiyá jema'ajeño, we'epiño mékajenaka weká. Palá la'akaño weká, Tupana wátaka ke la'akaño. Unká na kalé wala'á pu'uwaré ilérowa we'emaké ijwa'até wakajé. ¹¹Iwe'epí kaja mékeka wapura'ajiko ijwa'até pajluwano, pajluwano ke, kaphí ipechu i'imakáloje Jesucristo chojé penaje. Yuwaná jara'apá pura'akó riyani wa'até, ke kaja wapura'ajiko ijwa'até rinaku i'imaká. ¹²Wawakára'a ila'aká piyuke nakaje palá, Tupana wátaka ke. Palá waja Tupana le'ejena ina'ukena la'aká nakaje riwátaka ke. Riká i'iwapari iká ajopana ina'ukena e'iyayá rijluwa, ripalamane i'imakáloje rijwa'até je'echú chu. Rewá i'imakaño wakára'ajeri riká.

¹³Palani ijló Tupana puráka'alo, we'emakare ijló yukuna i'imaká, raú ipechu i'imá rinaku: “Unká ina'uké puráka'alo kalé riká; Tupana puráka'alo riká”. Ñaké ri'imaká. Ripuráka'alo aú Tupana apiyaka ra'apiyá jema'ajeño pechu, napechu i'imakáloje palá raú penaje. Ñaké i'imakale, we'emá Tupánajlo palá rila'akare weká yukuna. ¹⁴Re kaja Judea te'eré ewá kajrú Jesucristo ja'apiyá jema'ajeño. Ilé ke i'imakaño ne'emakale, judíona nakiyana la'año chapú wani neká. Ñaké kaja iñakajela ewájena la'aká iká chapú, ra'apiyá jema'ajeño i'imakale. ¹⁵Neká, judíona nakiyana, noño júpimi Tupana puráka'alo ja'apátajeño michuna i'imaká. Ñaké kaja nawakára'aka Jesucristo nókana i'imaká, eyá chuwa, weká piño nala'á chapú wani. Unká wani ina'ukélaruna neká Tupánajlo; chapú wani kaja napechu piyukeja ina'ukena nakú. ¹⁶Marí kaje aú nala'á piño chapú wani najluwa. Wawátajla Tupana puráka'alo

yukuna i'imakana ajopana, unká judíona kalé i'imakáñojlo, ripalamane aú ne'emakóloje kapichákajo liyá ra'apiyá jema'akana aú, e'iyonaja nawata wapu itakana, we'emaká piyá riyukuna najló. Ilé ke nala'aká aú weká, richaje wani nala'aká pu'uwaré. Ilé kaje pachá kajrú wani Tupana wajájika neká.

Pablo wátaka nachaje i'ijnakana yukuna marí

¹⁷Nojena, kaja wa'apáña a i'imaká, ñakele unká wamálaje piño iká júpija. E'iyonaja kalé re jo'ó kaja jo'ó kajrú wapechu inaku, raú wawata ichaje i'ijnakana piño. ¹⁸Pulapé nuká wátaka ichaje i'ijnakana, e'iyonaja kalé Jiñá Chi'inárikana itari wapu paliyáaka. ¹⁹Jesucristo pa'ajiko majó wakajé, pu'ují nupechu i'imajika, iká jema'akale Tupana ja'apiyá, nu'umakale ijló riyukuna i'imaká. ²⁰Riká la'arí palá wapechu inaku, jema'akale ra'apiyá, ñakele pu'ují wapechu.

3 ¹⁻²Wawátajla ichaje i'ijnakana. Unkale meke la'ajé wajña'alá panaku amákana, unká kaja wawe'epílale iyukuna, raú wawakára'a ilé ño'ojó ichaje we'ewé Timoteo. Weká yuréjeño wekoja maare Atenas e. Palá Timoteo ja'apátaka Jesucristo i'imataka iná kapichákajo liyá yukuna wajwa'até. Riká wawakára'a i'ijnaká ichaje ka'ajno, ra'akáloje ináthé, ipechu i'imakáloje richaje ke kaphí Jesucristo chojé, ipechu i'imaká piyá ujwí ra'apiyá jema'akana nakú. ³Apala inakiyana wátano ra'apiyá jema'akana yuríkana naliyó, ne'iyajena la'akale chapú iká. Kaja iwe'epí Tupana wátaka wajña'aká chapú kaje panaku. ⁴We'emaké ijwa'até wakajé, wemá ijló i'imaká: “Re ne'iyajena la'ajeño iká chapú, jema'akale Jesucristo ja'apiyá”. Wemaká ijló i'imaká, ke nala'aká iká me'etení. ⁵Kaja noma'á riyukuna, raú nukawíla'o inakojé. Raú numá Timotéojlo, ri'ijnakáloje ka'ajno ichaje, riwe'epíkalaje mékeka ipechu Jesucristo nakú, nupechu i'imakale inaku: “Apala Jiñá Chi'inárikana ka'átari ne'iyajé, nayuríkaloje Jesucristo ja'apiyá jema'akana penaje. Ilé ke ri'imajika ee ijló, unká na penaje nakaje wewíña'atakare i'imaká i'imalaje ijló”, ke nupechu i'imaká inaku.

⁶Kaja Timoteo pa'ó piño majó, rapumí chuwá pajimila Tesalónica eyá. Palani yuku wa'até riphá majó wanaku, rimá wajló inaku: “Re jo'ó kaja jo'ó kaphí napechu Jesucristo chojé. Íki'ija jo'ó kaja nawátaka Tupana, ñaké kaja nawátaka ajopana ina'ukena. Re jo'ó kaja nawe'epika iká; pu'ují jo'ó kaja napechu inaku. Nawata wani amákana piño, iwátaka namákana ke kaja”, ke rimaká wajló inaku.

⁷Wejena, kajrú wamaka chapú kaje yajwé maare. Ilé ke rimaká aú wajló inaku: “Re jo’ó kaja jo’ó kaphí napechu Jesucristo chojé”, ke, raú palá wani wapechu la’akó piño. ⁸Chuwa, kaja palá weká maare, wawe’epíkale unká iyurila iliyó Jesucristo ja’apiyá jema’akana. ⁹Ilé ke i’imakale, wemá Tupánajlo: “Pu’ují wani wapechu pinaku, nema’akale palá jo’ó pa’apiyá”, ke. Pu’ují kaja wapechu inaku. ¹⁰Kajrú wapura’akono Tupana wa’até inaku; mawó kaja wemaká rijló, we’ejnakáloje ichaje penaje. Nakele nuwata re jo’ó kaja iñathé a’akana nupuráka’alo aú, iwe’epíkaloje richaje palá wani ra’apiyá jema’akana nakoje.

¹¹Wawata wara’apá Tupana, wawakára’ajeri Jesucristo wa’até, a’aká wañathé ichaje i’ijnakana aú. ¹²Wawata kaja wawakára’ajeri a’aká iñathé, iwátakaloje raú íki’ija pekowáaka, ajopana ina’ukena wa’até. Íki’ija kaja weká wátaka iká. Raú wawata ñaké kaja iwátaka pekowáaka. ¹³Nuwata wara’apá Tupana la’aká ipechu kaphí, ra’apátakaloje iliyá pu’uwaré la’akaná, raú unká kaja na aú rimalaje meke inaku Jesucristo pa’ajiko piño majó wakajé, ajopana rile’ejena ina’ukena wa’até. Ñaké ri’imajika.

Iná la’akáloje palá penaje yukuna mari

4 ¹Chuwa wala’aká iká mawó, nojena. Nakele wawakára’ajeri Jesucristo apumí chojé ke numaká ijló, ila’akáloje richaje, richaje ke, we’echú ka’alá keja wewíña’atajika i’imajika ke, nakaje ila’ajíkare i’imakáloje palá Tupánajlo.

²Kaja iwe’epí nakaje, wemakare nakú ijló i’imaká, nakoje. Jesucristo wakára’aka wemaká ijló rinaku i’imaká, ke wemaká ijló i’imaká. ³Unká Tupana wátala ila’aká pu’uwaré, ñakele i’imá palá la’akaná nakuja. Unká kaja riwátala ila’aká imanáicho ajopana wa’até. ⁴Achiñánajlo numá: I’imá palá iluna wa’até, Tupana wátaka iná i’imaká pajwa’atéchaka ke. Iphá na’apí. ⁵Unká paala iwe’epika itukumó inaana wa’até la’akanaja kalé. Unká jema’alaño Tupana ja’apiyaja kalé we’epiño ilé kaje la’akana natukumó. Ila’aniña ñaké. ⁶Eyá la’arí rimanáicho apú yajalo wa’até, la’arí riká chapú wani raú. Kajrú Tupana wajájika namanáicho la’ajeño, kaja wemá ijló ñaké rinaku i’imaká. ⁷Tupana i’iwapari weká ajopana ina’ukena e’iyayá, we’emakáloje palá la’ajeño penaje. ⁸Ñaké riká, unká wátala nakaje numakare nakú ijló jema’akana, unká kaja iphala no’opí. Raú unká kaja riphala Tupana, a’arí ijló Ripechu i’imaká, ja’apí.

⁹Nuwe’epí íki’ija iwátaka pekowáaka, ñakele unká naje kalé numá ijló ñaké la’akana nakú; kaja Tupana jewíña’ata

i'imaká íki'ija pekowáaka wátakana nakú. ¹⁰Ñaké la'akaño iká, Macedonia te'eré ewá i'imakaño, e'iyonaja kalé, nojena, numá piño ijló, iwátakaloje pekowáaka íki'ija richaje, richájeno ke. ¹¹Iwe'epí itukumó palá pajwa'atéchaka i'imakana; ijapa palá ijluwa, ikawíla'aka piyá ajopana ina'ukena nakú; ila'á ijápaka'ala, wemaká ijló rinaku i'imaká ke. ¹²Ilé ke la'akana aú ajopana, unká Jesucristo ja'apiyá jema'ajeño nakiyana kalé i'imakaño, pechu i'imajé palá inaku. Ijápajika numaká ijló i'imaká ke ee, unká na nakú kalé ila'alaje kamu'ují. Unká kaja ikawíla'alaje ajopana nakú nakaje chaya.

Jesucristo pa'ajiko piño majó yukuna marí

¹³Nojena, wawata iwe'epika Jesucristo ja'apiyá jema'ajeño michuna kaja taka'akaño nakojé, ipechu i'imaká piyá kamu'ují wani nawe'epíkana aú. Unká jema'alaño Tupana ja'apiyá, unká we'epila mékeka nakaje i'imajika najló, raú napechu la'ó kamu'ují wani ina'uké kaja taka'akaño wa'até. ¹⁴Marí eja'awá chu Jesucristo i'imaká wakajé ritaka'á i'imaká. Rejomi rimakápo'o piño rapumí chuwa, raú wawe'epí Tupana makápo'otajika kaja piyuke kaphí Jesucristo chojé péchuruna penájemina michuna.

¹⁵Nakaje wawakára'ajeri Jesucristo jewíña'atakare nakú i'imaká, wemá nakú ijló. Ripa'ajiko majó wakajé, weká kajmuruna jo'ó i'imakaño, unká jácho'olajeño paineko kaja taka'akaño tukumá. ¹⁶Tupana wa'atéjeri, je'echú chiyájena wakára'ajeri, awíyo'ojeri najló. Tupana le'ejé luwiluwí kaje mejé jema'ajero, wa'ató ke wawakára'ajeri wani witúka'ajika je'echú chiyá majó. Rejéchami ra'apiyá jema'ajeño michuna makápo'ojiko. ¹⁷Rejomi kajmuruna jo'ó i'imajíkaño nawá'aje ají ke yenoje, kaja taka'akaño penájemina wa'até, Jesucristo jimaje nepháka'akajo juni juwáka'ala e'iyajé najwa'até. Rejéchami we'emajika rijwa'até matajnako je'echú chu. ¹⁸Ilé kaje yukuna i'imá pajlokaka, ipechu i'imakáloje kaphí raú.

5 ¹Jesucristo pa'ajiko piño majó wakajé jená nakojé, unká nulana'alaje ijló, nojena. ²Kaja iwe'epí palá, unká na kalé we'epéjeri mékechamika Jesucristo pa'ajiko piño majó jená. Mana'í chiyó piro'okeji iphaka lapí iná nane jata'ajé menáwaka, ke kaja Jesucristo iphájika majó mana'í chiyó, unká na we'epila mékechamika riphájika. ³Riphájika majó piyá, ne'iyajena kemájeño pajlokaka: “Chuwa we'emajika piyukeja palá pajwa'atéchaka, unká mérowa nókakajo i'imalaje”, ke nemájika pajlokaka.

E mana'ija ne'emajika ejéchami, kapichákajo iphájika nanaku, unká méño'oyo ne'emalajo richiyá. Inanaru iphaka roná chojé, ruwá'akaloje ru'urí penaje wakajé, kiñaja ri'imaká ruchá. Ñaké kaja mana'í chiyó kapichákajo iphájika nanaku.

⁴Nojena, kaja iwe'epí mékeka ripa'ajiko majó, unká ra'alá wajló renó. Mana'í chiyó riphájika ee, unká rikero'ótalaje ijló, piro'okeji kero'ótaka inajlo iná nane jata'akana aú ke kaja.

⁵Jesucristo wa'atéjena iká, ñakele iwe'epí palá kewákaje puráka'aloji nakojé. Unká mapechúruna i'imaká ke i'imakaño kalé iká; unká mapechúruna we'epila kewákaje puráka'aloji nakojé. ⁶Ñakele unká we'emalaje chuwa kamátakajo nakú i'imakaño ke. Unká we'epílaño kewákaje puráka'aloji nakojé i'imaño kamátakajo nakú i'imakaño ke; palá weká we'epika rinakojé, ñakele kajmuruna ke weká. ⁷Lapí ina'uké kamato, ñaké kaja ne'iyajena yuwéra'ako lapí. ⁸Eyá weká, we'echú japi keja i'imakaño, ñakele we'ejnataje wapéchuwa palá. Wapechu i'imachi kaphí Tupana chojé, wawátakaloje íki'ija riká, ajopana ina'ukena wa'até, raú wamejñátakaloje wekó Jiñá Chi'inárikana liyá.

Suráanajlo ne'ekú mejñátajona i'imaká, ke kaja Jesucristo ra'apiyá jema'ajéñojlo. Tupana i'imatari kapichákajo liyá kaphí Jesucristo chojé péchuruna. Newíla'aru mejñátajona i'imaká suráanajlo, ke kaja Jesucristo ra'apiyá jema'ajéñojlo. ⁹Unká riwajákaloje weká penaje kalé Tupana i'iwapá we'emaká rijluwa ajopana ina'ukena e'iyayá; ri'iwapá we'emaká ne'iyayá, Jesucristo i'imatákaloje weká kapichákajo liyá penaje. ¹⁰Riká taka'arí wachaya i'imaká, we'emakáloje rijwa'até matajnako. Kajmuruna jo'ó ka'ajná we'emajika, kaja ka'ajná wataka'ajé, majó riphájika piño wakajé. E'iyonaja unká meke ri'imalaje rijló, riphájika ejomi we'emajíkale piyukeja kajmuruna ke waja piyuke rijwa'até, reyá a'ajná ño'ojó.

¹¹Ñakele ila'á papechúkaka kaphí ripé marí puráka'aloji aú, me'etení ila'aká ke kaja.

¹²Nojena, re ina'uké e'iyá jewíña'ataño iká Tupana puráka'alo nakú, re kaja amájeño. Neká la'año jenakú Ripuráka'alo aú, ñakele iphá na'apí. ¹³Ipechu i'imá kaja palá amájeño nakú. Iwata neká íki'ija, nala'akale najápaka'ala Tupana kemaká najló i'imaká ke. I'imá kaja palá pajwa'atéchaka.

¹⁴Akha'á unká wátalajeño jápakaje, ijnuruna ne'emakale. Ipura'ó kaja ujwí péchuruna i'imajíkaño wa'até, napechu la'akóloje palá raú. Unká we'epílajeño palá Tupana puráka'alo nakojé ñathé a'ajé, nawe'epíkaloje richaje, richaje ke rinakojé. Amá palá

piyukeja ina'uké; iyúcha'aniño nachá, unkájika ee nala'á richuwaja Tupana wátaka ke.

¹⁵Ajopana ina'uké la'ajika ee ka'ajná iká chapú, ipura'aniño ile'eje jakumi nakú ñaké kaja nala'akana aú. Lanakiya ila'ajé palá pekowáaka; ila'ajé kaja piyukeja ina'ukena nakú palá.

¹⁶Ñakeja ipechu i'imaká pu'ují. ¹⁷Ipura'ó kaja methú ke Tupana wa'até. ¹⁸Imá rijló: “Palá pila'aká nuká”, ke, palá i'imajika wakajé; imá kaja rijló: “Palá pila'aká nuká”, ke, chapú kaje yajwé amájika wakajé. Ilé ke riwátaka Jesucristo ja'apiyá jema'ajeño kemaká rijló.

¹⁹Tupana Pechu wátari iwakára'ajeri i'imakana, ñakele jema'á ra'apiyá, rila'akó piyá ujwí iwakára'akana nakú. ²⁰Tupana ja'apiyá ke inakiyana ja'apátaka Ripuráka'alo ijló; ipechu i'imaniña Ripuráka'alo nakú: “Unká na penaje kalé riká”, ke. ²¹Iwe'epí palá piyukeja puráka'aloji nakojé, iwe'epíkaloje kewaka ka'ajná riká, pajlakaje ka'ajná. I'iraó kewákaje puráka'aloji nakojeja. ²²Iwátaniña wani pu'uaré la'akana, imanáicho kaje la'akana.

²³Nuwata Tupana la'aká ipechu palá, ikawíla'ako piyá nakaje nakú; nuwata kaja rila'aká inaku palá, raú i'imakáloje rile'ejena wani ina'ukena. Iyurí ichó rijló, raú ra'akáloje rinakojó iká. Raú ipechu nakú nakaje, riwátakare la'akana waja, i'imajeri. Ila'aniña pu'uaré, i'imakáloje palá la'ajeño rijló raú. ²⁴Tupana a'arí iká rijwa'atéjenawa penaje. Rikaja kaja la'ajeri ijló nakaje rimaká inaku i'imaká ke.

Kaja penaje Pablo kemakare nakú najló marí

²⁵Nojena, eko ipura'ó Tupana wa'até wanaku. ²⁶Eko palá piyukeja wejena ilérowa i'imakáñojlo ka'ajno. ²⁷Eko ipura'ó marí puráka'aloji wa'até piyuke Jesucristo ja'apiyá jema'ajéñojlo. Jesucristo apumí chojé ke numaká ijló rinaku, ila'akáloje ñaké. ²⁸Nuwata wawakára'ajeri wani Jesucristo la'aká inaku palá wani.

Kaja.